

# SANTO NATALE 2023

A guardà 'l ciel quand che l'è bel  
Se ved lusì 'na marea de stel  
Che fan i sô gir con tal armonia  
Che par de sentì 'na melodia!  
Gh'è sta 'na nôt, domilan fa,  
Che fin su la Tera s'hin fa 'scoltà.  
Quand ch'è nassù on por Bambin  
Dent d'ona stala, tra on boeu e on asnin:  
L'univers inter l'ha vorrù fa festa  
Côri d'angiol e nigol de stel sora la sua testa!  
Gh'è persin sta 'na stela, la pussé bela,  
Che l'è scapà via a la chetichela  
Per cor distant, fina in orient,  
Per fag savé anca a chela gent  
Che l'era vegnù al mond el Re d'Israel  
Per tiral foera di sô guai e fal pussé bel.  
Tri sapientoni che spetaven on segn  
Han vedù chela stela giust come 'l pegn  
D'ona antica promessa che cuntaven su  
D'on Salvador ch'el saria nassù.  
L'è sta inscì che coi sô camel  
S'hin metù in strada propri per quel.  
Camina, camina finalment hin 'rivàa  
E a Gerusalem han comincià a cercà

In la regia d'Erode, quel gran tiran,  
Che l'ha interrogà i sô rabin e scrivan.  
Savù la risposta jhà mandà via:  
Che andasser a Betlem a cercà 'l Messia!  
Miracol! La stela l'è tornà a fass vedè  
E hin rivàa a Betlem andandog adré.  
L'han troà, finalment, quel santo Bambin  
Che quand i ha vedù la slongà i sô manin:  
L'era in brascia a sua Mama, la Santa Maria,  
E s'hin 'ginogià a 'doral: l'Epifania!\*

*Don Arnaldo*

\**Epifania = Manifestazione.*

*Questo Bambino viene “manifestato” al mondo  
come Re (oro), Signore (incenso) e Messia (mirra).*

